

共同經課 - 1 出埃及記三章一節~十五節

1 摩西顧伊的丈人米甸的祭司葉忒羅的羊群；趕羊去曠野的後面，到上帝的山，就是何烈山。2 耶和華的使者佇荊帕內火焰中對伊出現。伊看見，看啊，荊帕互火燒，荊帕也無去。3 摩西講：「我今欲越過去看此個大的景象，此個荊帕怎樣無去啊？」4 耶和華看見伊越去欲看，上帝就對荊帕內叫伊講：「摩西！摩西！」伊就講：「我佇遮。」5 伊就講：「你莫得近倚來。著褪你腳裡的鞋，因為你倚的所在是聖地」；6 閣講：「我是你的祖公的上帝，亞伯拉罕的上帝，以撒的上帝，雅各的上帝。」摩西遮伊的面，毋敢看上帝。7 耶和華講：「我的百姓倚起佇埃及的，in的困苦我實在已經看見啦；in為著督工者來喉叫，我已經聽見啦。我本知in的痛苦，8 今我落來欲救in脫離埃及人的手，導in出彼個地，到肥沃、開闊的地，到流奶及蜜的地，就是迦南、赫、亞摩利、比利洗、希未、耶布斯、許個族的所在。9 今以色列人喉叫的聲到互我聽見，我也看見埃及人苦楚in的艱苦。10 今你來，我欲差你去見法老，導我的百姓以色列人出埃及。」11 摩西對上帝講：「我是甚麼人通去見法老，導以色列人出埃及啊？」12 伊講：「我實在欲及你佇啲。你導百姓出埃及了後，恁欲佇此個山服事上帝；這欲做我差你的證據。」13 摩西對上帝講：「看啊，我到以色列人遐，對in講：『恁祖公的上帝差我來恁遮。』in若問我講：『伊叫甚麼名？』我欲給in講甚麼啊？」14 上帝對摩西講：「我是自然而然的」；閣講：「你著給以色列人按呢講：『自然的差我到恁遮。』」15 上帝閣對摩西講：「你著對以色列人按呢講：『差我到恁遮的，就是耶和華——恁祖公的上帝，亞伯拉罕的上帝，以撒的上帝，雅各的上帝。』這是我永遠的名，這是我的紀念，到萬代。

共同經課 - 2 詩篇一百零五篇一節~六節，二十三節~二十六節，四十五c節

1 恁著感謝耶和華，求叫伊的名，佇萬百姓的中間報揚伊的所做！2 著向伊吟詩，向伊唱歌謳嘍！談論伊一切奇妙的所行！3 著因為伊的聖名來誇口！尋耶和華的人，心內著歡喜！4 著求耶和華及伊的權能，常常尋見伊的面。5 伊的奴僕亞伯拉罕的後裔，伊所揀雅各的子孫啊，恁著數念伊所做奇妙的事及伊的神蹟，及伊的嘴判斷的話。6 (見詩。) 23 以色列也到埃及；雅各出外佇舍的地。24 耶和華互伊的百姓生澁多多，互in比對敵卡強，25 伊變換對敵的心怨恨伊的百姓，續用詭譎的計謀款待伊的奴僕。26 伊差伊的奴僕摩西及伊所揀的亞倫，45 恁著謳嘍耶和華！

共同經課 - 3 羅馬書十二章九節~二十一節

9 疼著無假；怨恨歹，親近好。10 疼兄弟，著相親愛；敬重人，著相推尊。11 論殷勤，毋通貧憚。論心志著熱熱，論主著服事。12 佇向望著歡喜，佇患難著吞悞，佇祈禱著常常。13 聖徒所欠缺的就供給伊；出外人著致意好款待in。14 窘逐恁的，著給in祝福；著祝福，莫得咒詛。15 及歡喜的人相及歡喜；及啼哭的人相及啼哭。16 相款待著同一樣的心；心志莫得好高，著促就卑微的；莫得掠家己做有智識。17 莫得用歹報歹；佇眾人的面前著圖謀諸個好事。18 若會得通及眾人和，就著盡力及in和。19 所疼的兄弟啊，莫得家己伸冤，著悞氣卡好；因為有記載講：「主講：『伸冤在佇我，我欲報應伊。』」20 若是你的對敵朽，著互伊食，嘴乾，著互伊飲；因為行按呢是將熱熱的火炭疊佇伊的頭殼頂。」21 莫得互歹卡贏，著用好卡贏歹。

共同經課 - 4 馬太福音十六章二十一節~二十八節

21 對彼霎起，耶穌才指示伊的學生知，伊著去耶路撒冷，對諸個長老、祭司頭、經學士受著多多苦楚，閣受害死，第三日復活。22 彼得牽伊，責備伊講：「主啊，千萬毋通！此個決斷無欲到佇你。」23 耶穌越轉身，給彼得講：「撒但，退去我的後面！你是我的塞礙；因為你所想毋是上帝的事，是人的事。」24 彼時耶穌給伊的學生講：「人若愛隨我，著看無家己，夯伊的十字架來隨我。25 因為，見若愛救伊的生命的，欲失落伊；見若為著我來失落伊的生命的，欲得著伊。26 人若得著全世界，來喪失伊的生命，有甚麼利益？抑是人欲出甚麼來對換伊的生命？27 因為人子用伊的父的榮光，及伊的天使欲來；彼時，欲照逐人的所行來報應。28 我實在給恁講，倚佇遮的，有人猶未死，會看見人子佇伊的國來。」